

表 狀

桂苑筆耕一

校印桂苑筆耕集序

記有之曰酒醴之美而玄酒明水之尚貴五味之本也黼黻文繡之美而疏布之尚反女功之始也古之君子必重其本始如此吾東方之有文章而能著書傳後者自孤雲崔公始吾東方之士北學于中國而以文聲天下者亦自崔公始崔公之書傳于後者唯桂苑筆耕與中山覆簣集二部是二書者亦吾東方文章之本始也吾東方以文爲尚至我朝益煥以融家燕許而戶曹劉以詩若文成集者無慮充棟宇矣而顧鮮有知崔公之書者余嘗見近代人所撰東

國書曰有載中山覆簣集者徧求之終不可得唯桂苑筆耕二十卷爲吾家先世舊藏自童幼時知珍而玩之然間以語人雖博雅能文而好古者亦皆言未曾見然則是書也幾乎絕矣使是書不行于東方是玄酒不設于太室而疏布不羈于犧罇也豈所以教民不忘本哉世或謂公文皆駢儷四六殊不類古作者公之入中國在唐懿僖之際中國之文方專事駢儷風會所趨固有不得而免者然觀公所爲辭逞逞多華而不浮如檄黃巢一篇氣勁意直絕不以雕鏤爲工至其詩平易近雅尤非晚唐人所可及是蓋以

明水疏布之質而兼有乎酒醴黼黻之美者豈不彌
可珍哉公在中國取科第入軍府亦旣已聲施當時
矣而一朝去之如脫屣及歸東方躋翰苑貳兵部以
至阿飡阿飡者新羅大官其顯用方未已也而顧又
自放於山林寂寞之濱以終老其身而不悔蓋度其
時之皆不可有爲也士君子立身蹈道莫有大乎出
處之際出處而不失其時非賢者不能也賢者之作
固不可使其無傳况其文傑然如彼而又爲東國文
章之本始者哉湖南觀察使徐公準平卽余所稱博
雅能文而好古者也聞余蓄是書亟取而校之捐其

俸掇以活字得數十百本用廣其傳曰不可使是書
絕于東國也嗚呼不忘本始教民厚也表章賢人勸
民善也徐公之用心也如此其所以爲政於湖南者
亦可知已役旣完徐公屬余曰子實傳是書今不可
以靳一言余辭不能得若崔公之蹟行本末與是書
之可備攷證者徐公之序詳之矣余無所復贅云甲
午九月大匡輔國崇祿大夫議政府左議政豐山洪
奭周序

校印桂苑筆耕集序

桂苑筆耕集二十卷新羅孤雲崔公在唐淮南幕府時公私應酬之作而東還之後手編表進于朝者也公名致遠字海夫孤雲其號也湖南之沃溝人幼穎慧絕倫年十二從商舶入中原十八舉進士第久之調溧水縣尉任滿而罷時值黃巢之亂諸道行營都統高駢開府淮南辟公爲都統巡官凡表狀文告皆出公手其討黃巢檄天下傳誦奏除殿中侍御史賜緋魚袋後四年充國信使東歸事憲康王定康王爲翰林學士兵部侍郎出爲武城太守真聖時挈家入

江陽郡伽倻山以終焉葬在湖西之鴻山或謂公羽
化者妄也夫以海隅偏壤之產而弱齡北學取科宦
如拾芥終以文章鳴一世同時賓貢之流莫之或先
豈不誠豪傑之士哉若其居幕數載知高駢之不足
有爲呂用之諸葛殷等之誕妄必敗超然引去去三
年而淮南亂作則又有似乎知幾明哲之君子其人
與文要之可傳不可泯者也據進表是集之外復有
今體賦一卷今體詩一卷雜詩賦一卷中山覆簣集
五卷唐藝文志則稱桂苑筆耕二十卷文集三十卷
而他皆不傳唯是集屢經鋟印板刻舊佚搨本亦絕

罕癸巳秋余按察湖南巡到武城謁公書院裴徊乎
石龜流觴臺之間俛仰遺躅有餘慨焉會淵泉洪公
以是集寄曰此近千年不絕如綫之文獻耳子其無
流通古書之思乎余如獲拱璧懼其愈遠而愈佚也
亟加証校用聚珍字擺印分藏諸泰仁縣之武城書
院陝川郡之伽倻寺嗟乎名醞之坊必題杜康良劒
之鐔必標歐冶爲其不忘本始也我東詩文集之祇
今傳者不得不以是集爲開山鼻祖是亦東方藝苑
之本始也庸詎可一任其銷沉殘滅而不之圖哉東
還後著作散逸無傳唯有梵宮祠墓之間披林藪剔

苔蘚尙可得十數篇彙附原集剗剗壽傳余竊有志而未遑云按史稱中和二年正月王鐸代高駢爲諸道行營都統五月加高駢侍中罷鹽鐵轉運使駢旣失兵柄復解利權攘袂大詬上表自訴言辭不遜上命鄭畋草詔切責之今考集中有謝加侍中表巽辭引咎而已無一語激忿勃謾又有謝賜宣慰表云仰睹綸音深嘉秕政師徒輯睦黎庶安寧其假借慰獎也若是之慙摯史所謂草詔切責者無乃非當時實錄也歟又按中和紀年止於四年而公進表年月系以中和六年蓋公以中和四年十月浮海翌年春始

抵國又翌年編進是集而前一年之改元光啓容或
未聞知也

歲在閏逢敦牂中元達城徐有渠書于湖南布政司
之觀風軒中

桂列金新庚

桂苑筆耕序

淮南入本國兼送詔書等使前都統巡官承務郎
侍御史內供奉賜紫金魚袋臣崔致遠進所著雜
詩賦及表奏集二十八卷具錄如後

私試今體賦五首一卷

五言七言今體詩共一百首一卷

雜詩賦共三十首一卷

中山覆簣集一部五卷

桂苑筆耕集一部二十卷

右臣自年十二離家西泛當乘桴之際亡父誡之曰

十年不第進士則勿謂吾兒吾亦不謂有兒往矣勤
哉無隳乃力臣佩服嚴訓不敢弭忘懸刺無遑冀諧
養志實得人百之已千之觀光六年金名榜尾此時
諷詠情性寓物名篇曰賦曰詩幾溢箱篋但以童子
篆刻壯夫所慙及忝得魚皆爲棄物尋以浪跡東都
筆作飯囊遂有賦五首詩一百首雜詩賦三十首共
成三篇爾後調授宣州溧水縣尉祿厚官閒飽食終
日仕優則學免擲寸陰公私所爲有集五卷益勵爲
山之志爰標覆簣之名地號中山遂冠其首及罷微
秩從職淮南蒙高侍中專委筆硯軍書輻至竭力抵

當四年用心萬有餘首然淘之汰之十無一二敢比披沙見寶粗勝毀瓦畫墁遂勒成桂苑集二十卷臣適當亂離寓食戎幕所謂饘於是粥於是輒以筆耕爲目仍以王韶之語前事可憑雖則傴僂言歸有慙鳬雀旣墾旣耨用破情田自惜微勞冀達聖鑑其詩賦表狀等集二十八卷隨狀奉進謹進

中和六年正月日前都統巡官承務郎侍御史內供奉賜紫金魚袋臣崔致遠狀奏

桂苑筆耕集一部二十卷

都統巡官侍御史內供奉崔致遠撰

桂苑全書

桂苑筆耕集卷之一

表一十首

都統巡官侍御史內供奉崔致遠 撰

賀改年號表

賀通和南蠻表

賀建王除魏博表

賀封公主表

賀殺戮黃巢徒伴表

賀處斬草賊阡能表

賀收復京闕表

賀殺黃巢表

賀降德音表

賀廻駕日不許進

歌樂

表

賀改年號表

臣某言今月某日得進奏院狀報奉十一日宣下改
廣明元年爲中和元年者展義龜城易名鳳紀美號

既新於曆象歡聲遍振於寰區臣某誠抃誠躍頓首
頓首臣謹案王制云天子西巡狩命典禮考時月定
日同律然則三秋啓候萬乘省方金郊興肅殺之風
玉壘應巡遊之地遂遵規於舉正爰降命於改元且
大戴禮曰中也者天下之大本和也者天下之達道
致中和天地位焉萬物育焉故漢益州刺史王襄俾
蜀詞人王褒作中和樂職宣布之詩以歌君德耆舊
傳揚况及聖朝曾編新樂舉二月恬和之節播八風
調暢之音永驗休譚實諧昌運伏惟聖神聰睿仁哲
明孝皇帝陛下纂承寶位丕闡皇猷將務格苗暫勞

避狄風始行於地上易象可徵日再耀於天中休禎
斯在是以紀年有裕懸法無虧帝業中興則遠超於
前漢後漢物情允洽則近繼於元和太和足可使蠢
植昭蘇華夷悅服掩神雀黃龍之瑞應河清海晏之
期則彼萑爾叛徒騷然嘯聚偶縱煙塵之患卽歸原
野之誅佇廻西幸之儀便舉東封之禮臣今者旣獲
成師以出必能仗義而行跡泛戈船心馳劒閣冀陳
戎捷永賀堯年臨楚水以魂飛朝天可待望秦雲而
目極捧日爲期未獲榮列朝班稱慶行在無任抃躍
戰懼屏營之至謹奉表陳賀以聞臣某誠歡誠喜頓

首頓首謹言

賀通和南蠻表

臣某言臣得進奏院狀報入南蠻通和使劉光裕等
廻雲南通和兼進獻國信金銀器物疋段香藥馬等
者天威遠振星使遄歸化外癡內黠之徒竭奉贄獻
琛之禮德旣超於萬古恩已洽於四夷臣某誠欣誠
抃頓首頓首伏以聖主卜征旣以用和爲貴遠人從
化自知犯義不祥是得事尙從權德資含垢言皆答
響禮不違經且南蠻嘗懷異謀久稔邊患數年猾夏
獨虧控北之誠列鎮徵兵驟動征南之役則乘虛可

慮怙亂難防今者鳳口銜書纔飛遠地狼心感德永
順皇風有以見皇帝陛下法古爲君視人如子以藏
疾匿瑕爲妙策以玩兵黷武爲良箴能昭利害之鄉
不失羈縻之道遂使要服修貢賓旅歸仁適當多事
之秋已見太平之兆則彼驃信實狗封之族尙革昏
迷賊巢迺蟻聚之羣何難撲滅佇聆大捷永賀中興
必可驅堯舜而殿禹湯苑五岳而池四海盛矣美矣
念茲在茲臣頃者禦寇交州董戎蜀郡先則展馬援
討除之勢後乃設隨何說諭之機仰托皇威粗申將
略喜當今日免負初心限守藩條不獲稱慶行在無

任賀聖戀恩欣躍屏營之至謹奉表陳賀以聞臣某
誠抃誠躍頓首頓首謹言

賀建王除魏博表

臣某言臣得進奏院狀報二月二十二日恩除建王
可開府儀同三司兼太保充魏博節度使者維城茂
德列土殊勞逮分閩外之憂實表寰中之慶臣某誠
歡誠喜頓首頓首臣聆周歌麟趾漢譬犬牙固須地
處親賢方得天垂寵寄伏以建王修善爲樂居高不
危好書而旣擅多才獻表而肯慙求試今以鄴稱上
鎮魏有大名將資磐石之宗遂錫分圭之寵豈獨漳

濱之俗遠荷恩威永令海內之人皆歌德業臣限守藩鎮不獲稱慶行在無任踴躍屏營之至謹奉表陳賀以聞臣某誠欣誠躍頓首頓首謹言

賀封公主表

臣某言臣得進奏院狀報奉去年十月十四日勅旨皇帝第十一妹封遂寧公主長女封唐興公主次女封永平公主待收復京闕備禮冊命者芳舒玉葉寵襲金根鬱佳氣於高天振歡聲於率土臣某誠欣誠抃頓首頓首伏以遂寧公主德資元吉考祥於歸妹之占唐興公主永平公主譽洽肅雍稟慶於降嬪之

典伴嫦娥於獨月分婺女於雙星秀發青春光浮碧
落伏惟皇帝陛下齊家理國恭已敬親流鳳展之殊
恩舉鸞闈之美命猶以暫勞仙蹕未復皇都畱具禮
於宮闈待成功於干羽捧日而榮滋九族欽風而喜
播四方臣限守藩條不獲陪位稱慶行在無任抃蹈
聳踴之至謹奉表陳賀以聞臣某誠喜誠躍頓首頓
首謹言

賀殺戮黃巢徒伴表

臣某言臣得進奏院狀報北路軍前定難軍節度使
拓跋思恭保大軍節度使東方逵等奏宣君縣南殺

戮逆賊黃巢徒伴二萬餘人生擒三千人並賊將者
又鳳翔節度使李昌言奏探知京中賊徒潰散六月
十三日皇帝御宣政殿排仗受宰臣及百僚賀禮畢
者睿謀遠叶戎捷遄陳開雉扇而儼皇威舉鸞旌而
恭列辟天浮喜氣地匝歡聲臣某誠喜誠抃頓首頓
首伏以逆賊黃巢嘯聚兇狂偷生晷刻養姦而惟日
不足恃暴而謂天可欺敢驅螻蟻之羣累拒熊羆之
衆孽唯自作罪欲何逃拓跋思恭東方逵等身居重
位手握雄師氣吞蠹彼之徒志解赫斯之怒齊驅於
六步七步果剗於左之右之戰于野而騰威戎難伏

莽拘諸原而騁勇勢若焚枯不唯剝面搥喉乃得連
頭係頸况李昌言鎮於岐下伺彼京中識虞譚鷹集
之祥辯師曠鳥聲之樂遂飛吉語遠達宸聰佇看大
戮之期克踐中興之運伏惟聖神聰睿仁哲明孝皇
帝陛下財成三極敦叙九疇出震位而臨人方瞻堯
日幸坤維而罪已更闡舜風暫勞遵養之師遙委仁
賢之將旣誅逆黨爰列賀班濯錦江邊已睹霞舒綵
仗蒼龍闕下卽聆雷振鑾音永清四海之波遍灑九
天之澤臣謬操鈇鉞尙默鼓鼙未唱凱歌唯知抃舞
顧彭野之久妨道路怒髮雖衝望秦原而將滅煙塵

愁眉已展臣限拘守鎮不獲稱慶行在無任欣抃聳
踴屏營之至謹奉表陳賀以聞臣某誠歡誠躍頓首
頓首謹言

賀處斬草賊阡能表

臣某言得進奏院狀報西川都將高仁厚部領兵馬
收捉草賊阡能已於十月十八日並處置訖二十一
日聖駕出羅城北樓宣慰廻戈將士各賜優賞放歸
本營者遠耀日旗高張天網梟帥已歸於大戮鴻圖
永耀於中興臣某誠歡誠抃頓首頓首臣伏以草賊
阡能跡陷迷津心辜聖澤短狐稔射人之毒瘕狗喧

吠主之聲高仁厚逐惡志雄擒奸氣勇仰資睿略靜
剗兇徒伏惟皇帝陛下有罪必誅無思不服歌採薇
而遣卒念破竹之成功親降如綸之言遍安被練之
卒妖氛息而綿山益翠喜氣浮而錦水先春自此遠
振軍聲深摧寇黨覆頑巢而在卽廻法駕以何遙臣
方事專征先聆吉語限拘藩鎮不獲稱慶行在無任
踴躍屏營之至謹奉表陳賀以聞臣某誠歡誠喜頓
首頓首謹言

賀收復京闕表

臣某言臣得河中節度使王重榮牒報四月十日當

道與鴈門節度使李克用及都監楊復光下諸都馬
軍齊入京城與賊交戰約殺却賊步軍一萬餘人其
馬軍賊便走出城往東南路去其賊軍家口錢帛並
皆遺下黃巢亦未知存亡其逃遁賊徒尋差兵馬追
奔並已收復京闕訖者天威耀武月捷傳聲望宸階
而初奏凱歌舉區宇而咸增抃舞臣某誠喜誠躍頓
首頓首臣竊窺曩代旁採前經靜理邦家必須以殺
止殺保安社稷固在雖休勿休是故不得已而用兵
無所私而煦物伏惟皇帝陛下纂臨寶位丕闡宏圖
匝四溟而不見揚波安九野而皆能偃草而乃逆賊

黃巢暗遵邪徑深入禍門久騰吠噪之聲敢恣穿窬
之便穢黷宮闕淹延歲時偷安暫戲於鼎中戮暴難
逃於机上今者風行睿略雨集王師楊復光任在信
臣李克用名爲勇將各思報効競奮驍雄齊心而覆
滅梟巢戮力而尅收鳳里賊巢拒輪不暇亂轍潛奔
干戈則電散風飛金帛則填街塞巷更展追遊之勢
必擒稔惡之徒自此日月重光煙塵永息唯望宸遊
之返駕佇觀盛禮於登封臣職忝董戎功慙徇難雖
手無重柄數年虧奮擊之能而耳得嘉聲遠地倍歡
呼之功臣限拘藩鎮不獲稱賀行在無任手舞足蹈

慶抃屏營之至謹奉表陳賀以聞臣某誠喜誠躍頓首頓首謹言

賀殺黃巢表

臣某言臣得武寧節度使時溥狀報逆賊黃巢尙讓分隊並在東北界於六月十五日行營都將李師說陳景瑜等於萊蕪縣北大滅羣兇至十七日遂被賊將僞僕射林言梟斬黃巢首級並將徒伴降部下都將李惟政田球等訖其黃巢函首已送行在者聖日重耀狂氛暗銷戎捷超於古今歡聲振於夷夏臣某誠抃誠躍頓首頓首臣伏以歲有四時則秋行肅殺

之令武有七德則兵貴禁戢之能是故歲以無相奪而克成兵所不得已而方用自革結繩之政皆勞祝網之仁賊巢食土懷頑含沙稔毒深犯天紀廣致地災九州則半致侵凌三輔則久經穢黷擢髮而旣難數罪搯喉而只待懲姦今者窮寇廻心元兇授首殺傷者少歸附居多有征無戰之言實符王道以靜待勞之勢深叶軍機伏惟皇帝陛下運啓中興功資下武睹天鑑而實爲大警聽風謠而非止少康永當銷干戈之鋒便可鑄耒耜之器况乃西山八國數年飽巡幸之恩東岳百神終日渴登封之禮佇迎雲馭俯

納巖音臣密邇寇戎撫安疆境不暇爭鋒而進實防
代俎之譏慙虧犬馬之勞喜睹鯨鯢之戮手舞足蹈
魂飛膽揚臣限守藩條不獲奔走稱賀行在無任慶
抃兢越之至謹奉表陳賀以聞臣某誠歡誠喜頓首
頓首謹言

賀降德音表

臣某言臣得進奏院狀報司天臺奏六月十六日夜
太陰虧伏奉六月二十三日德音應三川管內見禁
囚徒等宜委所在長吏五日內疎理決遣其京畿四
面暴露骸骨宜委諸鎮切准前後勅旨差人收拾埋

瘞者望舒匿影曲赦流恩化洽泣辜義資掩骼振歡
聲於蜀壘蕩妖氛於秦川臣某誠抃誠躍頓首頓首
臣伏以日能順晷而照臨不失其所月以順時而盈
缺則維其常况當蓂莢初凋桂輪自減兵銷下土非
石麟暗鬪於東陵謫見上天致玉兔暫虧於西汜既
同君子之過乃軫聖人之憂伏惟聖神聰睿仁哲明
孝皇帝陛下光闡睿圖保寧區宇仁能及遠德以勝
妖爰當展義之辰克舉眚災之典慈傷痍死牢囚免
滯於風霜義貫幽魂道殫皆沾於雨露可使涪水耀
千年之色巴山呼萬歲之聲道能繼於垂衣法無妨

於委轡佇廻巡幸仰賀登封臣限守戎藩不獲稱賀
行在無任抃躍屏營之至謹奉表陳賀以聞臣某誠
歡誠喜頓首頓首謹言

賀廻駕日不許進歌樂表

臣某言臣得進奏院狀報伏審勅旨廻駕日應沿路
州縣切不得輒進歌樂及屠殺者聲除飾喜味減薦
珍遠遵罪已之言深播好生之德凡於蠢動孰不歡
呼臣某誠抃誠躍頓首頓首伏惟皇帝陛下日月運
行雷雨作解體堯舜之理能咸若法禹湯之興必勃
焉退庭舞而撤宮懸惡衣服而菲飲食一慈二儉守

玄祖之格言沐雨櫛風稟太宗之丕訓今則冕旒東顧桂柅西移師乙收心無以逞鏗錡之曲庖丁斂手何由挫觳觫之形義感六牲恩加萬姓則乃蜀山力士旣無煩役之虞漢水老人豈有深譏之事帝業永資於下武物情皆慶於中興臣方擁戎旃阻隨仙蹕遙思盛禮空馳拱北之誠願報深恩但勵鎮南之志無任抃躍屏營之至謹奉表陳賀以聞臣某誠歡誠喜頓首頓首謹言

桂苑筆耕集卷之二

表一十首

謝加太尉表

謝示南蠻通和事宜表

謝立西川築城碑表

謝賜御製真贊表

謝御札衣襟並國信表

謝就加侍中表

謝賜宣慰兼加

侍中實封

表

請巡幸江淮表

請巡幸第二表

讓官請致仕表

謝加太尉表

臣某言今月某日宣慰使供奉官嚴遵美至奉宣聖旨慰諭臣及將校等並賜臣勅書手詔各一封加臣檢校太尉依前充淮南節度使兼東面都統者仰窺

鳳詔謂對龍顏寵榮極而何力負山戰灼深而自容
無地臣某誠抃誠感頓首頓首臣伏以大司馬之威
權百官所仰上將軍之法令十道皆遵豈唯整戢五
兵實在諧和七政况當今日宜屬全材如臣者德乏
潤身智虧周物於儒則筆慙五色在武則劒敵一夫
但以荷寵天庭分憂水國擁旄重寄榮冠絕於一時
仗鉞專征冀折衝於萬里幸逢聖鑑得盡忠誠今者
已率雄師將誅巨猾征旗指路遠趨堯日之光戰艦
凌波方託舜風之力豈期王人遠降帝命俄臨獎其
外鎮之微勞授以上司之劇任未著緇衣之美旋叨

錦被之榮况乃兼制利權廣潤軍食瑞節不移於南
亮兵符亦綰於東陞將何異能勝此寵寄謹當冰爲
夕飯藥作朝食褰帷則面撫烝黎建旆則身先士卒
羣寇旣蝟毛而起偶忤倂張諸侯必馬首是瞻共成
剪滅唯力斯視何心自安必也臨亂忘身見危致命
仰解焦勞之念粗伸式遏之功臣旣當下瀨屯師佇
欲中流設誓枕雕戈而輟寐跡寄轅門瞻帝座而馳
誠魂飛輦路未獲稱謝行在無任感恩戀聖榮抃戰
懼之至謹因宣慰使嚴遵美廻附表陳謝以聞臣某
誠感誠懼頓首頓首謹言

謝示南蠻通和事宜表

臣某言二月二十六日宣慰使供奉官李從孟至伏
奉勅旨入鶴拓使胄嗣王龜年閣門使劉光裕等廻
得驃信表並國信兼布燮揚奇肱與西川節度使書
皆備述情誠無不順命其表及書白並答信物數並
令錄往此事首末自卿良謀者遠降王言深窺使節
跪閱上天之旨坐知外域之心寵飾踰涯憂惶若厲
臣某誠抃誠躍頓首頓首臣才非間代智不濟時但
以每鎮窮邊粗安荒服免使飽飛飢附欲令前倨後
恭頃者忝守成都冀申遠略遂憑釋子善諭蒙王仰

稟天威得揚風教永戢干戈之患俾陳玉帛之儀雖
羣議沸騰競銜鑠金之口而宸衷剴斷早推匪石之
心是以暫事西巡或虞南叛爰遣維城貴胄直閣近
臣廻聖德以降尊遠傳玄化譯訛言而獻欵備寫真
誠旣令抱義戴仁果見奉琛執贄此皆陛下威德臣
何力之有焉而迺謂臣有先見之能知未來之事設
和蠻之良策備幸蜀之嚴城俯錄勤勞迴垂稱獎睹
雕題之章奏書軌旣同息猾夏之猜嫌梯航相接驗
南琛之贖咎知北極之紓憂雖云五利有餘敢希茂
賞唯願四方無事永贊昌期臣限守藩條不獲稱謝

行在無任欣躍感戴兢惕之至謹因供奉官李從孟
廻附表陳謝以聞臣某誠惶誠恐頓首頓首謹言

謝立西川築城碑表

臣某言伏奉十一月六日勅旨以臣在任西川節度
使日創築羅城昨因有勅嘉獎方進所賜碑詞今已
付所司鐫寫建立者一片石文龜初戴立九重天語
鳳已銜來雕銘莫繼於色絲寵飾遽超於華袞仰窺
恩獎俯抱憂惶臣某誠感誠懼頓首頓首頃者幸夢
三刀久臨益部遙提一劒得挫蒙兵但以其玉壘可
稱金城未設山口則空吞蠻蜚水頭則斜枕犍犂含

溪抱谷之形雖云天險比屋連薨之勢實類野居臣
是以運度籌謀斟量板築蓋從人欲果致子來遂得
役興而草偃川中誠感而土生石上長圍於三十六
里高鎮於百千萬年不愧鐵名可將錐試隼墉烏堞
儼若騫飛錦浪綿峯迥然裝飾遂蒙陛下辱褒稱之
重許刊勒之榮以爲事實可觀足得詞華不朽臣雖
遇泥封激賞豈將油素矜誇非敢彰謙所期避謗今
者伏遇皇帝陛下遠巡勝槩親覽微功徵舊賜之碑
詞命新鐫之筆跡永使卓立琴臺之境平欺劒閣之
銘且杜元凱之峴亭無非自衒阮德規之齊國蓋是

衆成謾傳身後之虛名豈睹目前之盛事曷若彩毫
見獎翠琰斯刊因成下土之功終應上天之意得逢
今日別振孤風向非陛下錄善恩深酬勞德厚則何
以未有出師之業篆刻叨榮曾無興學之規傳揚竊
美臣限拘鎮守不獲稱謝行在無任感戴欣躍戰懼
之至謹奉表陳謝以聞臣某誠惶誠恐頓首頓首謹
言

謝賜御製眞贊表

臣某言二月二十六日宣慰使供奉官李從孟至伏
奉勅旨已令於大慈寺御眞院寫朕眞並扈從宰臣

等眞列卿儀貌俱會此堂今先寄卿眞軸並朕親製
贊述賜卿冀表顯恩式彰異禮者銀璫降使玉簡傳
詞受宣而頂踵光輝拜賜而神魂驚越臣某誠感誠
懼頓首頓首臣志欽渭訣業鍊圯書敢憑涓滴之勞
自安寵寄願掃氛霧之患永竭忠誠遂在先朝便從
戎役南征北伐豈暇寧居東鎮南藩累叨重任遇陞
下龍飛之後委微臣隼擊之能蜀國防蠻則粗伸遠
略楚宮捍寇則偶遂良機旋令移節於海門復許建
牙於淮甸是以常拘戎閫未覲宸階唯披上天之詔
書似睹日中之玉字空增戀闕莫遂歸期頃者虔託

仁祠寫畱麼質豈致去思於舊鎮唯慙取笑於空門
伏遇陛下展義陳詩停鑾駐蹕遂徵繪事俾寫聖容
其於侍從之臣宜居左右豈料孱微之質得潤丹青
愧無驚領之姿永侍龍顏之側况蒙宸襟顧矚御筆
贊揚高題而素壁爭輝卓立而浮埃不染然後遠飛
寵詔特遣貴臣乍捧綵牋驟竊游揚之譽初開寶軸
深驚刻畫之恩窺看而形影自慙感激而肺腸何極
昔漢朝中興聖帝下念功臣列形像於禁宮載勲名
於史筆雖令贊述不自稱揚豈如陛下暫事巡遊迥
垂獎飾別降絲綸之命親編錦繡之詞俾臣位掛於

鳳凰池中名超於麒麟閣上遐尋故實獨荷殊榮有
何出衆之能見此非常之寵所謂千年嘉遇萬代美
譚唯當志勵風霜永驗松筠之不改身霑雨露免憂
蒲柳之先衰臣限守藩條不獲稱謝行在無任感恩
戀聖榮躍兢懼之至謹因供奉官李從孟廻附表陳
謝以聞臣某誠惶誠恐頓首頓首謹言

謝御札衣襟並國信表

臣某言二月二十六日宣慰使李從孟至伏蒙聖恩
別賜臣御札衣襟並御服衫一領龍腦香一金合金
銀花散碗一口金花銀榼一隻者缺窺神筆恩襲御

衣仙香氣撲於鼻根寶器光騰於眼界仰霑寵錫俯
積憂兢臣某誠感誠懼頓首頓首臣每念業紹弓裘
任叨斧鉞誓傾忠節終報聖朝去年親率驍雄願殲
兇醜旋承綸音已駐舟師旣慙叩楫之言徒切枕戈
之望豈期貂冠傳命龍袞裁書辱宣尼一字之褒過
光武十行之詔加以粉分御筭香滿雕奩花鐫乃麗
水之珍雪缺透任山之器捧玩而實驚寮吏緘藏而
永耀子孫雖有幸逢時輝榮驟集而無功受賞愧恥
難居徒荷鴻私何申豹略身依楚水未陳告捷之書
目斷蜀天但灑感恩之淚臣限守藩鎮不獲稱謝行

在無任荷戴激切榮抃兢懼之至謹因供奉官李從
孟廻附表陳謝以聞臣某誠惶誠恐頓首頓首謹言
謝就加侍中表

臣某言臣伏奉去年十一月十一日恩制加授臣侍
中依前淮南節度使階勳封並如故仍加食實封一
百戶者有命自天處身無地感深以泣寵極而驚臣
誠抃誠懼頓首頓首伏以黜陟分科聖君至教行藏
守道達士良規慮受爵以斯亡在持盈而不殆臣自
提權筦便遇兵戈郡邑爲征戰之場山海足逋逃之
藪旣難聚利莫遂成功况乃權有他門刃無餘地動

見越庖代俎無非避柱觸楹遂虧漕輓之程僅壞銅
鹽之法伏蒙皇帝陛下俯詳直道不寘嚴誅選用良
才改移重務而乃察臣在公之節念臣戀主之誠重
委將壇更增封邑恕乏一時之秀許攀七葉之榮唯
慮慙卿或譏竊位然臣今所以自賀者三朝獨立七
鎮榮遷每當拜爵王庭不省謝恩私室以茲勵已永
免愧人謹當激發壯圖殲夷窮寇粗息四方之患仰
寬萬乘之憂臣限守藩條不獲稱謝行在感恩戰灼
屏營之至謹奉表陳謝以聞臣某誠慙誠懼頓首頓

首謹言

謝賜宣慰兼加侍中實封表

臣某言六月十六日供奉官劉叔齊至奉宣聖旨慰諭臣及將校並賜臣勅書手詔各一封官告一通就加臣侍中仍加食實封一百戶餘如故者自天降命無地安身啓鳳詔而魂驚對貂冠而股慄臣某誠感誠懼頓首頓首臣早因薄效每忝殊榮勤王而素乏實勤受爵而但多虛受負山寡力臨谷戒心况自我馬生郊陣蛇出穴妖氛蔽闕法駕省方臣久鎮雄藩嘗提重柄一無成績兩拜寵章前者以上將軍爲大司馬今則兼納言之任加眞食之榮累年虧橫草之

功終日抱伐檀之恥且易曰或錫鞶帶終朝三褫之
詩云受爵不讓至于已斯亡遍覽格言是懲貪祿不
能報國苟欲榮家臣實何心有覩于目但遇王人遠
降聖澤旁流仰睹綸音深嘉秕政以爲師徒輯睦黎
庶安寧俯念忠誠特行懋賞臣也方寸之地可倚咫尺之顏不違豈敢矯俗陳情節詞讓爵難效一辭而
退唯期三命益恭旣除勞力於利權終願勵心於閭
寄臣伏限守藩不獲奔赴行在稱謝無任感恩戀聖
戰汗屏營之至謹附供奉官劉叔齊奉表陳謝以聞
臣某誠惶誠戀頓首頓首謹言

請巡幸江淮表

臣某言伏以舜伐有苗修德而終能率服湯征自葛
行恩而競望來蘇斯皆今古之美譚實乃帝王之盛
事固敢跼天負責向日裁誠仰陳利害之端冀副華
夷之望不量狂瞽遠黷聖聰臣某誠惶誠懼頓首頓
首臣聞日月以運行為德永麗于天江河以委輸是
期必朝于海上能昭其煦育下方遂於通流况乃天
災非人力能除地分有兵戎不起將獻永安之兆輒
陳可復之詞伏自寇陷上京兵徵外鎮猛銳始從於
鶴列旋致徒歸頑兇尚固於蟻封難成盡殪臣豈唯

投袂實至衝冠昨率舟師暫屯江次必欲朝離楚岸
暮及漢濱旗張商嶺之風劒拂秦川之霧願言薄伐
冀效微勞尋蒙陛下遠許分憂不令離任臣進退惟
命始終無虧寧招曠職之譏敢涉爭功之責又緣淮
海乍息煙塵忽若去兵必當致寇則迺江南沃壤盡
成蠶食之資淮北強隣暗展鯨吞之勢輿賦旣無所
倚軍須將必屢空是以仰奉勅書已班師旅四境之
赤眉歸伏八州之黔首謐寧遍布皇恩粗申將略然
而關中縱敵閩外偷安旣乖踊躍以身先每切忸怩
於顏厚伏惟皇帝陛下省方展義駐蹕經時龜城壯

麗之形金湯雖固鳳輦巡遊之費桂玉可虞况舊謂
西川富強祇因北路商旅託其茶利贍彼軍儲今則
諸道發表章則半載始廻徵貢獻則經年未達實緣
道路遼負兼值干戈阻難值剽掠者斯多至行朝者
甚少加以僦雇所費耗蠹不輕每當水運陸船只可
率鍾致石以此征稅則漸成抗弊軍兵則未遂飫饒
伏慮扈從實繁宴犒仍廣盡搜資於三蜀難濟用於
百司苟興旰食之憂實慊庶寮之望又以蜀川僻居
邛棘缺人密邇蠻戎虺毒潛吹獸心難測儻或乘虛
犯境率衆渡瀘六軍之熊豹騰威縱能制敵八詔之

豺狼作暴不免喧驚事可酌於將來禍須防於未兆
伏惟陛下覽臣忠懇察臣直言暫迴西幸之儀更舉
南巡之禮使處處息後予之怨人人安戀主之心天
下幸甚天下幸甚且如遠狩河陽僞遊雲夢將興霸
王俯順權宜况江淮爲富庶之鄉吳楚乃繁華之地
陛下九年理國四海爲家豈比周之東遷非擬晉之
南渡賊巢兇狂久聚穢黷難除縱便收城未宜迴駕
豈如楊都粵壤桂苑名區四夷之賓易朝天九牧之
貢無虛月伏乞陛下俯迴鳳宸略泛龍舟必想山靈
卷三峽之風水伯寢九江之浪退尋禹跡允叶堯巡

昔也日耀錦川天不傾於西北今則風行澤國地無缺於東南然後發使清宮舉章司隸振盛儀於歸闕告休績於登封臣雖識昧變通而志勤匡濟敢憑草奏輒貢管窺無任戀聖感恩戰越屏營之至謹奉表陳請以聞臣某誠惶誠懼頓首頓首謹言

請巡幸第二表

臣某言聞聖人能以天下爲一家以中國爲一人者必闡於其義達於其患然後能爲之臣遂自前年繼陳短識請移車駕巡行江淮計資於避險就安事叶於暫勞永樂未廻聖鑑再獻瞽言臣某誠慙誠懼頓

首頓首臣尙阻擒奸敢言伐善然但願愚夫之一得
難追賢者之三思臣頃鎮成都偶諧遠慮克符天意
亟就土功別營雉堞之雄規永壯龜城之峻境爰憑
釋子善誘蒙王果悛倔強之愆便付懷柔之信皆資
帝力能肅物心伏遇陛下遠耀珠旗高臨玉壘樂降
絲綸之旨深加毫髮之勞謂臣有先見之機念臣以
至誠所感仰銜睿獎倍激忠誠然則當年已往之功
粗成籌畫今日未來之事竊有管窺苟或緘辭則爲
負德不辭鼎鑊輒貢芻蕘臣近者俯察時情仰瞻乾
象荊州道路羣寇將侵蜀國封疆微災似起儻或未

收鳳闕尙駐鑾輿忽有妖氛潛興近境必恐烏合蠶食之徒占據江陵把斷峽路則列鎮貢賦無計流通行在詔書亦難傳降若見東西阻絕固當遐邇動搖伏惟陛下斷自宸衷斥其橫議念江淮之進獻遠涉多虞察蠻蜚之奸兇乘虛可懼早移仙蹕直幸楊都滅星辰交錯之災叶日月運行之理則乃九州斧鉞討戎而齊願風驅四海梯航奉贄而必能雲集盛矣美矣念茲在茲且逆賊黃巢久黷皇居多成穢跡直到剋收之後須勞繕葺之功更俟二三年之間可興千萬世之業慮不先定事難速成伏乞陛下覽竭節

之言聞隨時之義俯從衷懇暫事宸遊天下幸甚天下幸甚臣粗識古今略詳利害自非微以爲智豈敢知而不言謹奉表陳請以聞臣某誠惶誠懼頓首頓首謹言

讓官請致仕表

臣言臣伏以聖君御宇必先塞彼倖門良士省躬唯慮妨其賢路苟速官謗是辜主恩况臣關中無定難之勲閫外乏分憂之效強欲晏安寵祿其如玷浼刑章永言量力而行固在奉身以退既知無隱寧避有辭臣某誠慙誠懼頓首頓首臣少勵琢磨晚師擒縱

不以一經介意粗於三略畱心願紹家勲免虧堂構
先皇帝念臣孤直試以諸難出分大將之威權坐受
上卿之爵秩故得內稟聿修之訓外伸式遏之能北
掃虜庭則胡雛不敢南牧南清獠海則蠻謀無由北
窺及覲彤墀暫司緹騎俄屬齊郊聚擘鉅野興師臣
也不才謬膺斯任伏遇皇帝陛下纂臨宸極警諭戎
藩舉旌鉞以分勞聽鼓鼙而軫念謂臣有戢兵之奇
略察臣立降寇之微勞遂令位假中台名編外相夢
想旣通於鳳沼威稜益峻於龍旌其後瀘水波驚蜀
山霧暗久念雕題之患遍流黔首之災又蒙命臣曰

俞爲帥於彼爰遵薄伐得解倒懸豈敢貪天之功願
銘鍾鼎祇能因地之利別建溝隍伏蒙陛下俯獎忠
誠特行懋賞開國授周司徒之貴立家紹漢丞相之
榮臣此時早誠持盈輒思請老必願告休錦里退隱
羅浮不料隴上耕夫盡解揭竿斬木草間惡子競謀
蟻聚蜂飛當荆門失守之時乃楚塞宿兵之際忝趨
戎旆兼綰牢盆僂俛而未能報恩驅馳而何敢言病
或楔猷磨牙於原野或鯨鯢噴毒於江湖尋提招討
之權來撫句吳之俗遠憑睿略深挫羣兇洎解印海
門建牙淮甸上將軍之劇任首冠列藩大司馬之雄

資先沾宥禮揣頂踵而偏濡雨露扼咽喉而莫效涓
埃且自黃寇憑陵翠華巡狩仰天戮力竊嘗服王導
之言終日痛心何止灑袁安之淚及至成軍已出又
緣奉詔却廻行藏雖順於綸詞進退實慙於物論遂
見時溥興北林戎役周寶致南鄰責言玉每慮於俱
焚金亦憂於衆鑠幸蒙陛下涵之以海量炤之以天
光如見肺腸得保首領然臣也先軫以直言逞志曹
植以深過責躬則二年忝都統之名不能誅奸戮暴
四載主銅鹽之務不能富國贍軍是以兵權則屢見
改移利柄則變爲分割凡此辱君之命莫非職臣之

由臣猶自知况在陛下擢髮而旣難數罪乞骸而唯
願辭榮今者大憝奔赴上京克復氛祲卽當殄滅寰
區永見廓清臣有忝登壇無能報國行當碁齒居亦
胡顏兼以頃鎮蠻陬久棲瘴嶺蒙犯其妖烟毒霧剗
除其封豕長蛇當年而靡憚勤劬晚歲而皆成疾疹
不將筋力爲禮旣載前經苟或身心自讎難逃後患
雖思強飯實愧素餐廣陵爲楚澤上游醴府乃漢朝
大任以臣衰老當此重難必恐終無所成遂希不可
則止伏惟皇帝陛下知人爲哲多士以寧選英才而
代處是邦俾微臣而退居散地鬪於菟之逃富固是

忠貞王內史之辭官誠非矯飾幸遇舜風無外漢日
再中陛下旣已除盱食之憂微臣亦希免夜行不息
臣無任望恩戀聖懇迫兢灼之至謹奉表陳請以聞
臣某誠感誠懼頓首頓首謹言

桂苑筆耕集卷之二

桂苑筆耕集卷之三

狀一十首

謝詔狀

謝詔示權令鄭

相充都統

狀

謝宣慰狀

謝詔獎飾進奉狀

謝詔示徐州事宜狀

謝詔止行墨勅狀

謝鄒公甫充監軍

手詔狀

謝除鍾傳充江

西觀察使

狀

謝就加侍中兼實封狀

謝秦彥等正授刺史狀

謝詔狀

右臣伏奉四月十日詔旨黃巢兇逆穢黷宮城罪惡貫盈人神共怒尋東兵合勢剪滅元兇想副朕懷已遵道路佇聞克復永耀功名者十行天語萬里星飛

捧窺而壯膽初驚跪讀而愁眉頓豁竊以黃巢禍心
斯極狠力既衰肉已太鹹果缺將落甞起烟塵之患
則歸原野之誅臣每當永夜枕戈早願中流叩楫自
啓行十乘已屯駐五旬伏緣江路多虞風波未便暫
淹行色用候良時非致役於遷延但興懷於矍鑠今
則仰覩鳳銜之詔况乘隼擊之秋俯勵軍謀仰遵睿
筭卽冀朝離江北暮到漢南長驅背水之師永破滔
天之孽率奮義感恩之衆氣已凌雲殄藏奸匿暴之
徒勢如沃雪伏惟陛下歲巡備禮時邁傳歌將示罪
於三危乃宣威於七德臣遠承獎諭誓盡勤勞身暫

寄於戈船心每馳於劒閣唯願西都獻捷早申收復之微功東嶽告成得覩登封之盛事臣無任感激兢懼之至謹奉狀陳謝以聞謹奏

謝詔示權令鄭相充都統狀

右臣伏奉去年九月九日詔旨卿曾間道獻章諸鎮飛檄便欲長驅甲馬親議專征未卽便來須權制置遂命鄭畋等分爲京城四面都指揮諸道師徒慮卿偶未委知故茲詔示者伏以書曰無偏無黨王化乃興詩云不識不知帝謀是稟况兵當伐叛事合從權臣去年先因淮北侵疆後值江南阻路久屯師旅未

遂戰征陛下妙選羣才近分重寄鄭畋等莫不身先
貔武手運豹韜旣當怒髮爭衝固謂賊胷可堪仰酬
睿獎竟勵忠誠臣也遠鎮臨戎強隣結憾唯慙曠職
豈望成功伏蒙陛下尙念勤勞曲垂慰諭覩上天之
慈意解外地之深憂旣許將軍獨舉柳營之令終期
叛卒必歸竹町之誅臣限守戎藩不獲稱謝行在無
任感激戰懼之至謹奉狀陳謝以聞謹奏

謝宣慰狀

右宣慰使供奉官李從孟至伏奉去年九月九日勅
書手詔兼宣恩旨慰諭臣及將士等者伏以感恩効

命武士常規仗順摧兇元戎素分賊巢偶乘奸便尙
追嚴誅臣願膾彼逆鱗轡其邪膽掃重氛於魏闕迎
法駕於蜀都是以去年據馬援之鞍敢矜獨勇杖辛
毗之鉞親率諸軍久在江干再承天旨不令離任遂
已班師豈料伏蒙陛下念及老臣撫茲衆卒特迂星
使遠降泥封綸傳萬乘之言纖微不間續彼百夫之
體慰暖皆均歡呼而聲已振雷感泣而淚將成雨唯
期勵節共願報恩臣限守藩條不獲稱謝行在臣無
任感戴榮抃戰懼之至謹因供奉官李從孟廻奉狀
陳謝以聞謹奏

謝詔獎飾進奉狀

進奏院遞到恩賜手詔一封

右臣伏奉詔旨以臣先

缺

供軍應接使駱潛等進奉

銀事特賜獎飾者伏以收功示賞乃聖主之異恩寓
物輸誠固藩臣之常事但屬敵滋隣境寇阻道途運
綱而旣闕先登贄禮而僅侔錫貢早成缺滯况涉艱
微是以雖憑孱水之珍難追塗山之罪豈料鴻毛比
價方申懇悃之心鳳口銜書遠降褒稱之旨感激而
懷榮爲懼揣脩而報德何期臣限守藩條不獲稱謝
行在無任荷恩戀聖屏營之至謹奉狀陳謝以聞謹

奏

謝詔示徐州事宜狀

右臣先奉詔旨據時溥奏卿本道羌兵侵境殺傷令務止遏者臣遂具時溥誣謗事由申奏伏奉二月二十五日詔旨今則寇孽不日勦除藩方務息爭競所宜和叶各保封疆者臣伏以天德既高側管者固難窺測日恩至廣戴盆者自阻照臨是以遠竭愚誠動違聖慮時溥既銜睿獎得縱兵威早成熊據之謀更展鯨吞之勢累興師旅來犯封疆焚郭邑於山陽掠資財於淮上臣遂令捍禦略挫兇狂而乃時溥奸計

已成根株巧言頗有枝葉不思已過敢惑宸聰今者再奉絲綸仰遵徽纆唯期寬則得衆粗可和而不同臣分閫無功戢兵爲務至於草寇猶許歸降况是隣藩豈謀侵擾彼無此詐此無彼虞臣限拘鎮守不獲稱謝行在無任感激屏營之至謹奉狀陳謝以聞謹奏

謝詔止行墨勅狀

右臣伏奉詔旨去春權降詔命許諸道承制除官已兩道降勅止絕自今後凡有要甄獎者並於急遞奏聞不得更議承制者臣伏以漢朝鄧禹始啓倖門魏

室曹瞞敢專重柄欲敦於自家刑國所惜者唯器與
名伏遇陛下遠事宸遊慮防爵賞遂降無私之澤遍
資諸道之權不料人人而競弄筆端處處而皆誇墨
勅長蛇封豕猶匿暴於神州狗尾羊頭已成羣於列
鎮臣年前雖奉詔旨未欲施行却緣親率軍兵遠期
征討此時久屯南浦將泛西江忽被鎮海節度使周
寶欲感軍情潛施巧計便以無功將吏悉皆超授官
榮臣所領士卒旣多將校不少彼安坐者猶爲甄獎
此遠行者豈免怨嗟遞口聲傳從頭憤激臣若不依
周寶必恐事生遂准詔書得行軍賞已曾一一具事

由申奏訖自奉前年十一月一日勅旨仰遵成命靜守常規至於近日所招賊徒只與往時先賜官告曾無僭越豈可隱藏今者外將忠誠永當無二大君善教已至再三泣告而天何未聆憂懷而地謂可入臣限拘藩鎮不獲稱謝行在無任戰越屏營之至謹奉狀陳謝以聞謹奏

謝郃公甫充監軍手詔狀

伏奉某月日勅書手詔各一封

右新授當道監軍郃公甫四月十日到伏蒙聖恩賜臣勅書手詔兼慰諭臣及將校等九天降詔萬里宣

恩柳營之列將歡呼桂苑之羣寮感泣伏以邈公甫
素懷材略久撫軍戎漢南之職業可觀江北之物情
獲賴旣見寬能得衆必令師克在和臣仰窺五色之
書俯慰三行之士喜氣高侵於畏日歡聲遠振於薰
風臣與將校等無任感恩激切榮抃屏營之至謹奉
狀陳謝以聞謹奏

謝除鍾傳充江西觀察使狀

右臣先奏請授鍾傳江西觀察使其高茂卿乞別除
廉鎮伏奉七月五日詔旨允許特賜獎飾者天從素
望風遞仙音旣諧舉善之誠實叶分憂之寄伏以鍾

傳比從屬郡來援府城撫綏而使洽衆情禦備而能
成遠略高茂卿旣多梗阻不免徊翔固難掉鞅而旋
豈許垂橐而入臣以戒之在鬪事可從權遂具奏論
輒陳利害不料一言之善遽得動天終令二將之才
皆榮列土鍾陵江徼銅柱海隅政成而必有可觀恩
重而各得其所臣限拘鎮守不獲稱謝行在無任感
激兢灼之至謹奉狀陳謝以聞謹奏

謝就加侍中兼實封狀

右臣得進奏院狀報伏奉某月日恩制加授臣侍中
餘並如故仍加食實封一百戶者九重降命萬里傳

聲側聆而踊躍忘疲內揣而怔忡失措伏以納言進
秩頒邑賞功固須德望鎮時仍有勲勞濟物然後方
可謂君無虛授臣無虛受如臣者謬提旄鉞免墜弓
裘空有志於四方竟無能於一割况自羣兇蝟結戰
陣蛇奔狂鱗久戲於鼎中聖駕遠巡於劍外臣也動
不能剗烟塵之患靜不能瞻山海之資遂蒙改易兵
權分張權課雖值盤根錯節其如有斧無柯安邦之
計策何成富國之機謀莫就唯甘黜爵以警慢官豈
期陛下恩洽無偏義深宥過特超衆例許陟高資印
標石鵲之祥早慙不次冠簪金貂之飾愈覺非宜况

叨真食之榮實愧素餐之咎但屬狼星未滅鯨浪猶翻方期抗旆以專征不敢懸車而請老謹當訓兵是務殄寇爲期粗申武弁之威仰報彤門之賞臣限守藩鎮不獲稱謝行在無任感恩戀聖戰汗屏營之至謹奉狀陳謝以聞謹奏

謝秦彥等正授刺史狀

新授和州刺史秦彥

新授滁州刺史許勅

右件官臣先奏請各授管內刺史今月某日得進奏院狀報伏奉某月日勅旨允許者九天降寵兩地分榮覩降將之懷恩喜元戎之獲請伏以秦彥等比者

爲梟爲獍維虺維蛇久流螫蠹之災未有誅鋤之便
臣偶令招諭旋自歸投遂假分符皆能守節誠宜獎
勸輒具奏論今者聖澤濡枯皇風盪垢纔擲黃巾之
飾許登皂蓋之資秦彥等旣荷新恩永除舊惡必也
出榮建隼入効懸魚學其守土之規贖彼滔天之罪
臣限拘藩鎮不獲稱謝行在無任抃戴兢灼之至謹
奉狀陳謝以聞謹奏

桂苑筆耕集卷之三

桂苑筆耕集卷之四

奏狀一十首

奏請從事官狀

奏請僧弘鼎充

管內僧正狀

謝許弘鼎充僧正狀

謝除姪男

瓊授彭州九隴縣令

狀

謝弟祝再除綿州

刺史狀

奏請姪男劬轉官狀

謝姪男弘約改名濟除授揚州大都府左司馬狀

奏請歸順軍孫端狀

奏李楷已下叅

軍縣尉等

狀

奏請楊行敏

知廬州軍州事

狀

奏請從事官狀

營田判官將仕郎殿中侍御史內供奉賜緋

魚袋宋綯

右件官相門傳慶詞苑成名退居安東郭之貧就養
奉南陔之詠自叅戎幕備見良籌佐理而星霜屢遷
清勤而風雨不改久裨重任敢覬殊榮伏請轉官改
章服依前充職

攝鹽鐵巡官朝議郎守京兆府咸陽縣尉柱
國高彥休

右前件官訓稟儒宗才兼吏術王畿結綬早見勤勞
賓席曳裾頗多婉畫望憲臺之清秩助權筦之重權
伏請轉官依前充職缺以前件狀如前伏以臣子之
所以立身者以孝以忠慎終如始若遂榮親之望必

勤事主之誠且如擇隣卜居斷織勵學至于成立色
養無虧能報慈母之恩則宋絢有焉又如教以義方
退而學禮至于仕宦力行有規能遵嚴父之訓則彥
休有焉臣是以久藉謨猷仍嘉德行事堪勵俗志切
薦賢伏惟皇帝陛下恩流域中孝理天下特廻睿獎
許假賓^缺冀令修己從知盡以敬親務本干黷宸扆
無任兢惶謹錄奏聞伏聽勅旨

奏請僧弘鼎充管内僧正狀

右件僧跡洗四流心拘八政演法於有緣之衆致功
於無^缺之言伏自翠華遠省於風謠丹詔屢徵於月

捷兕渠未滅銳旅猶勤弘鼎常令僧三十人晝夜轉
念功德張開覺道教化闔城所願早覆梟巢便迴鸞
駕雖不關於至理實自發於精誠兼緣當道屬郡旣
多仁祠不少若無綱領難肅緇流伏乞聖慈俯詳所
請許充當道管内僧正仍賜紫衣所冀身掛金襴逞
養鷹之雋氣手持玉柄制醉象之狂徒謹緣奏聞伏
聽勅旨

謝許弘鼎充僧正狀

右件僧臣先具狀申奏請充當道管内僧正仍賜紫
衣伏奉勅旨依允者伏以弘鼎久勤轉念輒具薦論

能資十地之因遽荷九天之寵元戎獲請喜三教之
並行法侶歡呼驚一佛之或出唯冀永持功德上報
慈悲苟不能盪火宅之餘災則何以稱水田之華服
必可潛燃慧炬助滅妖氛臣限守藩條不獲陳謝行
在無任感戴兢灼之至謹奉狀陳謝以聞謹奏

謝除姪男瓊授彭州九隴縣令狀

前守京兆府鄠縣尉高瓊

右件官是臣姪男今得進奏院狀報伏蒙勅旨除授
彭州九隴縣令仍賜緋魚袋者伏以高瓊早乏藝能
忝從祿仕佐理未閑於吏道列官已陟於王畿昨者

背秦嶺而脫烟塵面蜀川而就雲日雖有心於葵藿
且無托於萍蓬豈料不由薦論便賜超擢纔拋黃綬
遽沾墨綬之榮始佩銅章又竊銀章之貴况乃濛陽
屬邑益部名區正當巡幸之邦實謂來蘇之地豈伊
殘劣能此勝當臣也必令行慎履冰坐勤飲水勉追
芳於花縣無致辱於竹林臣限守戎藩不獲稱謝天
庭無任感恩戰懼之至謹奉狀陳謝以聞謹奏

謝弟祝再除綿州刺史狀

綿州刺史高祝

右件官是臣堂弟今得進奏院狀報奉某月某日恩

制除授金吾將軍被軍州官衆狀舉畱續准勅旨依
前授綿州刺史者恩資鳳宸喜集鵠原形影光輝精
魂震越伏以高祝早從裾履免墜箕裘旣懸報主之
誠得習牧人之術昨者忝膺寵寄粗舉政條銀水金
山曾無自潤帶牛佩犢或有可觀振家聲廉慎之名
致郡俗舉畱之請况乃秩假帝之喉舌官登王之爪
牙仕宦旣榮分憂又重祝也必遵勗勵更慎撫綏不
辜署劔之恩以謝擁轅之衆臣亦申教誨俾贖貪叨
俱在朝之盛儀雖慙前哲各爲郡之清譽可畏後生
共資綽綽之詩冀播優優之政臣限拘藩鎮不獲稱

謝行在無任感恩抃躍之至謹奉狀陳謝謹奏

奏請姪男劬轉官狀

前鄂州都團練副使朝議郎檢校祠部郎中
兼侍御史柱國賜緋魚袋高劬

右件官是臣親姪男粗詳吏術早忝官裳始佐理於
江陽旋從知於寒壤實得片言以折獄未嘗枉道而
事人遂荷寵榮已登班列尋叨命服久倅廉車方當
寇盜喧驚亦有籌謀施展加以每遵家法願報國恩
宗族稱孝悌之名僚友許溫恭之行臣是以輒思內
舉敢具上陳引以進之守戴禮之深義惟善所舉憑

魯書之美譚伏乞聖慈俯鑑忠懇特賜除授峽內刺史
劬也必能勵心從政常銘馬援之言竭力分憂不
負謝安之舉千黷宸扆無任兢惶謹錄奏聞伏聽勅
旨

謝姪男弘約改名濟除授揚州大都府左司馬
狀

朝散大夫前行閏州上元縣令柱國高弘約
右件官是臣姪男先具奏請除授揚州司馬並請改
名濟伏奉勅旨依允者九天渥澤萬里塗程沐恩命
於堯階泛光輝於阮巷負山旣重臨谷何安臣以高

濟早列官裳頗聞吏術建業字人之政曾有微功惟
揚典午之資敢希薄授始陳丹青驟竊殊榮濟也譽
雖讓於王晞名不慙於程昱聖君如父照臨實表於
無偏猶子比兒訓勵必遵於匪懈俾申勤效少贖貪
叨臣限守藩條不獲稱謝行在無任感恩激切兢灼
之至謹奉狀陳謝以聞謹奏

奏請歸順軍孫端狀

歸順軍都知兵馬使銀青光祿大夫檢校國
子祭酒兼左武衛將軍御史中丞上柱國孫

端

右件官巢鳥知風園葵向日能投善教永戢姦圖旣
悛抗斧之心可在執殳之列仰希甄獎輒具奏論伏
乞聖慈特授一官勒在軍前驅使冀率感恩之衆永
除稔惡之徒謹錄奏聞伏聽勅旨

奏李楷已下叅軍縣尉等狀

以前件狀如前伏以臣當府淮海粵區州縣多事永
言屬吏實藉得人每憂輿賦闕懸漸難責辯若俟銓
衡注擬恐失舉賢前件官等皆爲君子儒有古人志
學優則仕旣知祿在其中見善若驚不愧藝成而下
可以叅臣軍事可以代臣邑僚試假缺員頗彰殊效

况抱斑衣之樂冀攀黃綬之榮伏乞聖慈允臣所請
干冒宸鑑無任兢惶謹錄奏聞伏聽勅旨

奏楊行敏知廬州軍州事狀

右臣伏以武士所先惟忠與勇忠勇兼著行敏有之
自假郡符能勤缺理銳旅有爭先之志齊毗無背怨
之詞蓋乃訓練齊戎撫綏周室在於巡屬實越輩流
累具奏論請賜正授伏慮道塗艱阻未達宸聰每籍
幹能再陳薦舉永言成績可使頒條伏乞聖慈特賜
允許干黷宸鑑無任兢惶謹錄奏聞伏聽勅旨

桂苑筆耕集卷之四

桂苑筆耕集卷之五

奏狀一十首

奏誘降黃巢

下賊將成令瓌

狀

奏誘降福建道草賊狀

奏姪男劭

華州失守請行軍令

狀

奏論天征軍

任從海等衣糧

狀

奏論抽發兵士狀

奏請叛

將鹿晏弘授興元節度使

狀

進金銀器物狀

進漆器狀

進御衣段狀

進綾絹錦綺等狀

奏誘降黃巢下賊將成令瓌狀

草賊黃巢下擘隊賊將成令瓌徒伴四萬人

馬軍七千騎

右件賊徒元受黃巢指使占據潼關尋自擘隊奔逃

所在燒劫就中斬黃管內最甚傷殘臣伏以肅齊王者之師必期無戰遵奉聖君之德可恕有瑕暫緩討除先加告諭臣昨者專差押衙丁威賁委曲深入招誘果願歸降兼乞委任郡符展效忠節其成令壞臣當時補充軍前押衙兼給功名檢校國子祭酒兼御史中丞官告一通權知楚州軍州事以今月二十三日部領手下兵士到楚州倒戈訖伏緣楚州與徐州漣水對岸今春曾被寇戎驟來攻劫雖頻討逐未盡誅擒况漣水賊徒久蓄姦謀潛行偵諜常排戰艦欺視孤城再欲奔衝終爲患害臣以此特將此郡權授

令瓌既能投信義而來必得破頑兇之窟臣久臨戎
事素習軍謀以爲先則惠而後則誅兵家所貴遠者
懷而近者悅帝道方興上窺含垢之恩下察慕羶之
志不勞寸刃唯假尺書成令瓌遂革野心能從天意
叛徒四萬盡爲樂業之齊人精騎七千皆作輸忠之
烈士旣當恕罪倍見感恩蜂飛之小寇旋銷蝟結之
元兇可殄斯乃陛下祝除三網舞耀兩階信旣洽於
豚魚化能移於梟獍善師不陣敢矜止殺之權至道
無私但仰好生之德其成令瓌下願在軍門及放散
人數請續具申奏謹錄奏聞謹奏

奏誘降福建道草賊狀

福建道溪洞草賊何嶠張延鄂璩悚等徒伴
共八萬人

右件賊徒自去年冬侵劫信州界內臣以其道途阻
闊溪洞險艱若欲討除恐爲勞役遂於今年二月內
差節度衙推諸葛成充東面招諭使判官便賁委曲
職牒招諭其賊首何嶠等三人雖行匪有師而卜能
從吉一時應響三窟除姦纔當言下歸投兼乞軍前
展效臣缺二字委曲補職名追赴軍前俾申忠節臣伏
以小人興叛所迷者貪競之心上帝垂恩所惡者殺

傷之事終能耀德固可弭兵與其繼獻捷書曷若盡
收降款是以遠飛折簡便倒羣戈塵不假於曳柴風
自行於偃草溪頭洞口免汚煙霞閩嶺鄱江豁通道
路况乃各期後效盡願前驅能令八萬餘人永不二
三其意有以見陛下皇威天覆玄德日新四郊之煙
壘將銷萬國之梯航競集則乃軍中士卒安身而永
別戰場宇內生靈攜手而齊登壽域臣無任歌詠屏
營之至其何嶠等下補職名願隨臣征行及放散人
數請續具申奏謹錄奏聞謹奏

奏姪男劭華州失守請行軍令狀

具銜高劬

右臣伏以僨軍之將禮所興譏大義滅親傳曾垂訓
將肅安危之本必嚴賞罰之科竊自巨猾增驕王師
致討臣堂姪男劬比在河中司錄得受李缺都指揮
領昭義之甲兵收華州之城邑稍申鷹犬之力暫挫
梟狼之聲已蒙特降殊恩俯旌微效服榮金紫位忝
星郎始離蒲坂之具寮遽假蓮峯之通守誠合率忠
勵勇馘醜推兇稟進尺退寸之規決萬死一生之計
終申誠節仰報寵光昨者狂孽併來疲兵再戰旣絕
安西之救難申逐北之威然而不能潤草塗原永忘

苟活抑使靡旗亂轍旋見脫歸致諸道之星分縱姦
徒之霧結職此之過罪無所逃豈可當二峯保守之
時遽沾寵賞及一陣奔亡之後得免誅夷國有常刑
軍無貸法懲一勸百念茲在茲伏乞聖恩特行嚴典
徇于藩鎮警彼師徒所冀缺二字國章永能安於社稷
微臣家法亦不昧於神祇干冒宸聰無任責躬泣血
戰越之至謹奉狀陳請以聞謹奏

奏論天征軍任從海等衣糧狀

天征軍都將任從海及節級軍將並官健摠
二百八十七人

右臣得都將任從海及節級狀稱自赴征行已逾五載累曾沿海襲賊上江防虞去年軍都放廻本道從海等且在當府願隨行營者各得家信知西川已停衣糧伏緣從海等皆是貧寒更無營業彼處父母親屬便須委壑填溝請具奏論乞還衣糧者謹按史記釋云天子車駕所至則人臣爲僥幸賜人爵有級數或賜田租之半故因謂之幸也伏以任從海等萬里從戎五年于役不辭艱險願盡勤勞今者身在東吳職居西蜀此方苦於羈旅彼已停其衣糧遠路音書難寫征人之恨貧家親戚先懷餓殍之憂伏遇陛下

暫幸龜城未廻龍闕三川草木別有光榮萬戶烝黎
永能蘇息而任從海等久離本鎮不睹殊恩望雨露
之均沾恨煙波之迥隔固堪傷憫輒具奏論伏乞聖
慈允臣所請特令本道却給全糧所冀鳳駕巡遊士
卒皆知其有幸鴻慈煦育君親必表於無私謹具錄
奏聞伏聽勅旨

奏論抽發兵士狀

當道先准詔旨抽廬壽滁和等州兵馬共二
萬人仍委監軍使押領赴軍前者臣當時已
各帖諸州令排比點檢次又得進奏院狀報

近奉詔旨更於諸州催促兵士者

右臣伏以兵惟飾怒雖尚勇於戰征師克有和固推誠於輯睦苟非得衆何以成功臣當管廬州與和州舊有讎嫌至今疑忌唯謀以怨報怨未遂知和而和孫端新授滁州又與秦彥有隙既是滁和接境動有他虞若於光蔡會軍必酬舊憾事非便穩理合奏論臣自得招降多方控馭粗能禁戢免有動搖如今各出兵戈必恐自相魚肉輒陳利害冀慎始終謹錄奏聞伏聽勅旨

奏請叛將鹿晏弘授興元節度使狀

右當道賀正子將許令琮等今月日廻得狀稱三月五日陳許軍潰散節級鹿晏弘領兵馬二萬餘人打破金洋等州突入興元府坐節度使牛勗四日夜領隨從人並家累約二千餘人奔投龍州西山谷者伏以天未悔禍地多受災旣當易動難安非可懲一勸百鹿晏弘早驅散卒廣集叛夫始聆焚劫東都旋見奔衝西路本道節度使周岌累令招諭終不歸降豈興破浪之風但熾燎原之火今者逆黨則鯨吞盛府元戎則鼠竄危途爪距已成根株難剗儻或未恕亂常之咎別興伐叛之師卽恐終成一秦固應不利三

蜀且列藩貢獻諸道表章得達刀州皆由劍路况乃
鳳城已復鑾輅將旋縱令鵬鶚在天能摧狡窟若更
豺狼當道必礙行宮峽路雖通水程多慮不唯險阻
實且遐遙兼至上江皆爲賊境唯憂進獻莫遂通流
臣久竊寵光深懷驚憤遠詳事意輒具奏陳伏乞聖
慈霽雷霆之威廻雨露之澤速飛寬大之詔特委撫
綏之權鹿晏弘免致磨驚便當豹變必當克己永務
安人聖主含弘旣宥其窮斯濫矣姦臣驚悟亦免於
尤而效之謹錄奏聞伏聽勅旨

進金銀器物狀

金器 銀器

右臣伏以煙塵向息道路猶虞每慙仗鉞之榮多曠獻琛之禮得申遠貢唯有輕賫前件金器銀器等質變披沙形分鑄礫雖愧易盈之用且資虛受之功固敢竭航波梯巘之心助麟趾馬蹄之瑞貢金三品空陳任土之宜望闕九重未遂朝天之願感恩何極戀聖徒勤今差押衙王虔隨狀奉進謹進

進漆器狀

當道造成乾符六年供進漆器一萬五千九百三十五事

右件漆器作非淫巧用得質良冀資尙儉之規早就
惟新之製雖有慙於瓊玉或可代於琉瓶伏緣道路
多虞星霜屢換器貢難通於萬里綱行遂滯於三年
既失及時唯憂虛月臣今差押銀青光祿大夫檢校
太子賓客兼御史中丞上柱國辛從實押領隨狀奉
進謹進

進御衣段狀

當道先兼鹽鐵使織造中和四年已前御衣
羅折造布並綾錦等除先進納外續織造九
千六百七十八段謹具如後物色

右臣久權筦貨素乏籌謀多虧山海之資莫報雲天之澤前件御衣並綾錦綺等薄慙蟬翼輕愧鴻毛然而舒張則凍雪交光疊積則餘霞鬪彩旣成功於鳳杼希入用於龍衣儉德彌彰致美宜先於黻冕皇恩遠燭輸誠必鑑於絲毫其疋段物等臣謹差某官某押領隨狀奉進謹進


進綾絹錦綺等狀


進奉綾絹錦銀綺等一十萬疋段兩謹具色目如後物色

右臣伏以兵戈充熾郡邑凋殘仰思御輦巡遊唯恨

賦輿懸闕况乃當道巡屬之內招降頗多皆請占畱
將充供贍貴息寇戎之患難豐進獻之儀前件綾絹
錦綺等雖製自鴛機而價慙鮫室負謝八蠶之號劣
登三品之名祇將申任土之宜豈足備補天之用輕
微旣甚隕越何安其疋段物色謹差節度散兵馬使
王審球等押領隨狀奉進謹進

桂苑筆耕集卷之五





耕筆

一